

關聖帝君覺世寶訓

人生在世貴盡忠孝節義等事方於人道無愧可立身於天地之間若不盡忠孝節義等事身雖在世其心已死是謂偷生凡人心即神神即心無愧心無愧神若是欺心便是欺神故君子三畏四知以慎其獨勿謂暗室可欺屋漏可愧一動一靜神明鑒察十目十手理所必至況報應昭昭不爽毫髮淫為諸惡首孝為百行原但有逆理於心有愧者勿謂有利而行之凡有合理於心無愧者勿謂無利而不行若負吾教請試吾刀

敬天地禮神明奉祖先孝雙親守王法重師尊愛兄弟信朋友睦宗族和鄉鄰別夫婦教子孫時行方便廣積陰功救難濟急恤孤憐貧創修廟宇印造經文舍藥施茶戒殺放生造橋修路矜寡拔困重粟惜福排難解紛捐貲成美垂訓教人冤讎解釋斗秤公平親近有德遠避凶人隱惡揚善利物救民回心向道改過自新滿腔仁慈惡念不存一切善事信心奉行人雖不見神已早聞加福增壽添子益孫災消病減禍患不侵人物咸寧吉星照臨若存惡心不行善事淫人妻女破人婚姻壞人名節妒人技能謀人財產唆人爭訟損人利己肥家潤身恨天怨地罵雨呵風謗聖毀賢滅像欺神宰殺牛犬穢溺字紙恃勢辱善倚富壓貧離人骨肉間人弟兄不信正道奸盜邪淫和尚奢詐不重儉勤輕棄五穀不報有恩瞞心昧己大斗小秤假立邪教引誘愚人詭說昇天斂物行淫明瞞暗騙橫言曲語白日咒詛背地謀害不存天理不順人心不信報應引人作惡不修片善行諸惡事官詞口舌水火盜賊惡毒瘟疫生敗產蠱殺身亡家男盜女淫近報在身遠報子孫神明鑒察毫髮不素善惡兩途禍福攸分行善福報作惡禍臨我作斯語願人奉行言雖淺近大益身心戲侮吾言斬首分形有能持誦消凶聚慶求子得子求壽得壽富貴功名皆能有成凡有所祈如意而獲萬禍雪消千祥雲集諸如此福惟善可致吾本無私惟佑善人眾善奉行毋怠厥志